



PNTL

REVISTA 14

Polícia Nacional Timor-Leste
Ita nia Polícia 2017

Editorial	3
Mensajen	4
Discurso PM Inspeksaun parada ba Eleisaun Jeral	5
Progresu Ejekusaun OJE 2016	6
Inagurasaun Kuartél PNTL Munisipiu Lautem	8
Rekapitulasaun Data Asidente Janeiru To'o	10
Dezembriu Tinan 2016	10
Estatístiku Nasional Insidente no Tránsito 2016	11
PNTL Iha asaun	12
Membru PNTL 114 partisipa kursu ba sarjentu	14
Komandu PNTL fo Posse ba Superior Nain 3	15
2o Komandante Jerál PNTL Vizita Servisu iha Munisipiu	17
SIGN ho PGR halo distrusaun ba Droga	18
Membru UPM nain 21 Simu Graduasaun	19
Eleisaun Jeral 2017 Preparasaun forsa seguransa	20
Polisiamentu Komunitaria PNTL Avalia (PMC) Ho Parseiru	21
Komandu PNTL Entrega Laptop ba OPS	21

REVISTA PNTL

Responsavel Jerál

Komandante Jerál PNTL
Komisáriu Julio da Costa Hornay

Diretór

Komandante Relasaun Públika PNTL
Insp. Xefe Honorio Assis Barreto

Hordenador

Insp. Francisco Martins
1o Sjt. Julia Moniz

Editór

Lindalva de Deus Belo Assis

Jornalista

Victoria Maia de Jesus

Grafismu

Ajt. Estevão Pereira

Fotográfia

Ajt. Tomas Maia Rodrigues
Ajt. Jeremias dos Santos
Ajt. Estevão Pereira
Ajt. Melquiades do Nascimento

Sekretariadu

Ajt. Melquiades do Nascimento

Relasaun Públika no Midia PNTL

Rua Jacinto Candido - Caicoli - Dili

Website: www.pntl.tl

Email: koaliaho@pntl.tl

Nú. Kontaktu: **77 312 433**

77 394 446

77 325 881

sumário 14



editorial



Ami haksolok tebes hodi hasoru malu fali ho maluk lee na'in sira hotu, liu husi Revista PNTL Edisaun 14, ne'ebe sei ofere informasaun kona-ba atividade PNTL nian iha Nasional nomos Munisipiu hotu.

Hanesan ita hotu hatene katak iha tinan 2017 Timor-Leste halao Eleisaun Jeral (Prezidensial no Parlamentar ba periodu tinan 2017-2022) ne'ebe maka PNTL sei asumi responsabilidade servisu seguransa maximu.

Nudar instituisaun Seguransa ne'ebe maka ho nia papel prinsipal atu garante seguransa ba povu no nasaun ho nia riku soin tomak PNTL halo esforsu oi-oin no kooperasaun ho instituisaun relevante hodi fo suksesu ba festa demkrasia ida ne'e.

Aleinde ne'e, ami mos fo sai informasaun kona-ba Kursu Formasaun Sarjentu ba ajente PNTL inklui pastisipante husi Polisia nasaun membru CPLP ne'ebe maka halao durante fulan 9 nia laran, sitamos kona-ba Ejekusaun no Planu Orsamentu Jeral Estadu tinan 2017, Tomada de posse ba ofisial Superior PNTL nain tolu hodi priense pozisaun hirak ne'ebe maka sei mamuk no membru Unidade Polisia Maritima nain 21 simu graduasaun.

Atu kompleta liutan nesedidade publiku ba informasaun liu-liu konaba sevisu PNTL nian maka iha edisaun ida ne'e ami mos ofere ba le'e nain sira informasaun kona-ba SIGN no PGR halo distrusaun Droga.

Regularmente fo sai estatistika krime no asidente ne'ebe akontese iha territóriu tomak atu nune'e bele hatene hodi tau atensaun, tamba seguransa la'os PNTL de'it mak responsabiliza maibe, ema ida-idak sei tau iha konxiensia katak seguru ba nia vida importante liu.

Maluk le'e nain sira ksolok tebes iha biban ida ne'e hodi hatutan informasaun ba ita boot sira atu nune'e bele akompaña lalaok no servisu instituisaun seguransa ne'e hodi nune'e bele asegura estabilidade, paz no moris hakmatek ba povu no nasaun Timor-Leste hodi priense prosesu dezemvolvimentu tanba laiha paz maka dezemvolvimentu labele lao, laiha paz nasaun ho nia povu lahatene atu ba nebe no halo saida no wainhira laiha paz maka laiha futuro. Mai ita servisu hamutuk hodi kontribui ba paz no estabilidade iha ita nia rain.

Obrigadu barak.

Inspektór Xefe **Polisia Honório A. Barreto**
Xefe Relasaun Públika PNTL

Foto kapa

Komandante Munisipiu Bobonaro sai forsa parada iha Abertura Eleisaun Jeral



Diskursu PM Iha Serimonia Inspesaun Parada Forsa Seguransa Ba Eleisaun Jeral

Ita halo serimonia ohin atu fo hanoin hikas fali katak iha tinan 2017 fulan balu maitan ita sei halao prosesu demokratiku ne'ebe inportante ba povu no nasaun.

Polisia Nasional Timor-Leste(PNTL) iha mandatu konstitusional no legal atu garante legalidade demokratika no garante legalidade iha nasaun ida ne'e, no iha tempu hanesan respeita direitu, liberdade sidadaun sira nian iha eventu istoriku ida ne'e.

Eleisaun ne'ebe maka ita halao primera vez sai nia seguransa tomak sai nia responsabilidade rasik ba forsa seguransa Timor-Leste nian, ida ne'e ezame boot ida ba Timor-Leste ninia maturidade maibe teste boot ida mos ba kapasidade PNTL hanesan instituisaun ne'ebe tenke garante seguransa no ordem publika.

Komandante Jeral PNTL no Segundu Komandante Jeral hato'o ona planu kona-ba oinsa PNTL sei halao servisu durante eleisaun. Diretiva politika husi governu liu husi Ministru Interior mak ne'e laiha toleransia ba se deit ne'ebe hakarak atu rekore ba violensia hodi influensia rejultadu eleisaun.

PNTL hanesan instituisaun estadu nian ne'ebe tenke garante seguransa no ordem publika, tenke nafatin hatudu profesionalismu no disiplina iha aktu demokratiku inportante ida ne'e, no sei laiha toleransia ba membru PNTL ne'ebe partisipa iha atividade politika partidaria no atividade ilisitas artes marsiais nian.

PNTL tenke firme hodi inpoin lei no ordem iha sidadaun sira nia le'et mantein lei no ordem hodi garantia estabilidade seguransa no paz no sai ezemplu ba povu.

Iha nivel operasaional Komandante Jeral ho ninia sefias tomak prepara ona a nivel de membrus PNTL tomak tenke mos sintunija ida-idak nia aan ba ordem operasionais ne'ebe mai husi Komandu.

Eleisaun Jeral tinan 2017 tenke iha suksesu, tenke hatudu maturidade povu no nasaun Timor-Leste, tenke hatudu katak Timor-Leste maske foin maka atu celebra tinan 15 iha maturidade sufsiente atu avansa hanesan estadu no nasaun tanba ida ne'e mak sei hatudu sustentabilidade Timor-Leste hanesan nasaun soberanu.

Atu atinji ida ne'e PNTL iha papel inportante teb-tebes atu salva guarda lejitimidade demokratika, garante ordem no seguransa durante prosesu eleisaun no respeita liberdade no direitu sidadaun sira nian liu husi profisaun de integridade izensaun hodi hatudu profesionalismu iha servisu lor-loron nian.

Hau hein katak iha fulan hirak oin mai ho governu ida ne'ebe deit ita sei bele halo fali formatura iha fatin ida ne'e hodi hato'o parabens ba servisu ne'ebe PNTL halao ba povu no nasaun Timor-Leste

Dr. **Rui Maria de Araujo**

Primeiru Ministru Repúblika Demokratika de Timor-Leste

Progresu Ejekusaun OJE 2016

“Sustentabiliza Kontrolu no Jere Orsamentu PNTL Diresaun Finansas Orsamentu halao nia atividade hodi kontrola, monitoriza no mos produz relatoriu ezekusaun Orsamentu Jeral Estadu (OJE) 2016, servisu hirak ne’e halao periodu mensal no trimestral”.

Superintendente Asistente **Luis da Silva**
Xefe Departamentu Finansas no Orsamentu PNTL

Polisia Nasional Timor-Leste (PNTL) iha tinan 2016 ezekuta ona Orsamentu Jeral Estadu (OJE) %99 husi total orsamentu hamutuk \$28,930,529.00 ne’ebe maka governu preve bazeia ba planu ne’ebe maka PNTL iha atu halao servisu hodi fo seguransa ba povu no nasaun.

Orsamentu ne’ebe maka governu preve koloka ba kategoria 4 maka hanesan Salariu no Vensimentu, Vens no Servisu, Kapital Menor no Kapital Dezenvolvimentu, rezultadu ezekusaun ba orsamentu hotu-hotu atinji %99 no falta %1 maka sei iha komitmentu obligasi ba salariu ba gabinete Jeneru no seidauk tama ema nia rekening atu selu ou fila ba caixa jeral estadu.

Tabela Ezekusaun OJE 2016 ho nia Verva

OJE PNTL \$28, 930, 529.00

Kategoria Orsamentu	Total	Balansu Saldo	Persentajen Ezekusaun
Salariu e Vensimentu	\$13,393,000.00	217,025.75	%100
Bens Servisu	\$14, 873,529.00	31,101.62	%100
Kapital Menor	\$656,000.00	655.00	%100
Kapital Dezenvolvimentu	\$8000.00	0.19	%100

Departamentu Finansas no Orsamentu (DFO) hasoru problema iha ezekusaun ba trimester II tanba iha kategoria balu ne’ebe maka la koloka orsamentu maibe nesesidade Komandu nian nune’e Komandu desidi katak ida ne’e perioridade entaun tenke halo transferensia orsamentu hodi responde situsaun servisu ne’ebe maka Komandu orienta.

Alende ne’e Departamentu Finansas no Orsamentu enfrenta difikuldade interna no externa, difikuldade interna hare ba servisu PNTL nian ne’ebe interligadu maka proposta mai husi Komandante PNTL munisipiu no Unidade sira, dalaruma proposta atraza no dala ruma ami entrega orsamentu adiantamentu maibe relatoriu mai tarde tanba ne’e orsamentu adiantamentu iha tempu tuir mai mos tarde ne’e hanesan dezafiu ida atu aselera ami nia servisu.

Obstaklu externa maka Departamentu Finansas no Orsamentu halao lei Seguransa no jere OJE tuir Dekretu lei Nu 1/2016, lei produs ho ninia sistema birokrasia ezekusaun orsamentu naruk.

Orsamentu ho valor \$25.000 PNTL diretamente ba Ministeriu Finansas maibe valor bo’ot liu \$25.000l prosesu adiantamentu liu husi Ministeriu Interior hafoin ba Ministeriu Finansas.



Pakote Fiskal OJE tinan 2017 mai PNTL ho total \$29.255.000

Kategoria Orsamentu	Total
Salariu e Vensimentu	\$15.591
Bens Servisu	\$13,918
Kapital Menor	Zero (0) tanba pakote limita
Kapital Dezenvolvimentu	\$8000

Klasifikasaun Orsamentu Jeral Estadu:

- Kapital Dezenvolvimentu: hodi produs dezeniu ba uma Postu Polisia Suku ne’ebe maka atu hari iha Timor laran tomak no pagamentu ba retensaun %10.
- Kapital Menor Zero(0) pakote fiskal limita orsamentu la to’o maske PNTL propoin atu sosa viaturas hodi responde ba nesesidade Eleisaun Jeral 2017 tanba PNTL nia kareta hamutuk uniade 300 maka tama ona lelaun tanba ne’e ami husu governu atu sosa maibe governu desidi katak pakote ne’e orsamentu la kobre.

Governu aloka orsamentu adisional \$ milaun 2 ne’ebe koloka iha fundu dotasaun tudo governu iha gabinete Ministra Finansas, husi orsamentu ida ne’e maka sei apoiu mai PNTL atu halo seguransa ba eleisaun 2017 nian.

Orsamentu Fundu dotasaun todugu governu \$ milaun 2 ne’e koloka ba verva Vens Servisu no Kapital Menor hodi responde ba nesesidade maibe maioria %90 koloka ba Vens Servisu liu-liu kompras ekipamentu seguransa, aluga kareta, sosa Esperpack, komvustivel no seluktan.

Parlamentu Nasional aprova ona Proposta OJE tinan 2017 hafoin aprova Prezidente Parlamentu Nasional entrega ba Prezidente Republika atu promulga no publika iha Jornal da Republika hafoin Ministeriu Finansas anunsiau hodi hahu jere iha fulan Janeiru tinan 2017.



Inagurasaun Edifisiu Foun **Kuartél** **PNTL** Munisipiu Lautem

"Hamutuk Lautem Forsa No Forsa Hamutuk Lautem Bele"

Superintendente Polisia **Marcus Sequera Nunes**
Komandante PNTL Munisipiu Lautem

Lautem, atu fasilita servisu membrus Polisia Nasional Timor-Leste. (PNTL) iha munisipiu, Komandu PNTL inagura tan edifisiu foun Kuartél Jerál iha munisipiu Lautem ne'ebe ninia obra konstrusaun halo durante tinan ha'at.


Komandante Jerál PNTL Komisariu Julio da Costa Hornay ne'ebe ofisialmente inagura edifisiu ne'e apela ba Komandu munisipiu hamutuk ho membrus sira atu iha responsabilidade no obrigasaun hodi kuida edifisiu ne'e hanesan uma rasik.

Nune'e mos agredese ba Komandante PNTL Munisipiu no membrus Lautem tomak mesmu ho edifisiu ne'ebe maka uzadu maibe esforsu no didikasaun tomak bele halao serbisu tuir orientasaun komandu nian no mos importante ba Komandu maka buat ida ne'ebe iha, ita bele utiliza ho diak, ho sentimentu ida hanesan ita nia rasik, tanba dala ruma ita bele halo konstrusaun kuartél ida ne'ebe furak maibé kuandu laiha sentimentu kuida hanesan sasan rasik, tinan ida to'o rua bele att fila fali.

Komandante PNTL Munisipiu Lautem Superintendente Marcos Sequeira iha serimonia inagurasaun edifisiu ne'e hateten edifisiu foun Kuartél Jerál PNTL munisipiu Lautem ne'e bele ona fasilita servisu Komandu nian hodi atende no servi comunidade iha munisipiu Lautem.

Konstrusaun edifisiu foun ne'e nia kustu husi Orsamento Jerál Estadu ne'ebe maka koloka mai Institusaun Seguransa. Serimonia inagurasaun ne'e kompleta ho mini expozisaun hodi hatudu servisu seguransa no implementasaun Lei iha Munisipiu Lautem liu husi fotografia no video. Apresentasaun husi ofisial PNTL munisipiu Lautem nian kona-ba impaktu husi krime, impaktu husi kontra Lei trázitu rodoviáriu no aktividade VIP (Vizibilidade Involvementu no Profesionalismu).

Iha nia servisu lor-loron nian Komandu PNTL munisipiu Lautem kaer metin prinsipiu "Hamutuk Lautem Forsa no Forsa Hamutuk Lautem Bele" hodi servisu hamutuk iha Unidade nia laran atu garante seguransa ba povu no Nasaun Timor-Leste liu-liu Populasaun Munisipiu Lautem.



Photos: Melquiades do Nascimento PNTL

Unidade Tránsito

Rekapitulasiun Data Asidente Viasaun Husi 13 Munisipiu Durante Tinan 2016

PNTL Unidade Tránsito seguransa rodoviaria (PNTL) rezista Kazu Asidente hamutuk 1,739 ne'ebe rezulta husi ema kanek kma'an,kanek todan no mate.

Inspetor Xefe **António L. C. Soares**
Komandante Tránsito



Kauza husi asidente tráfitu hirak ne'e maka fatór umanu, fatór viatura no kondisaun Estrada.

“Ita hatene katak asidente tráfitu ne'e kauza husi fatór ha'at maka hanesan fatór umanu, kondisaun viatura, kondisaun Estrada no mós fatór naturais, maibé entre kazu sira ne'ebe maka rejista, número ne'ebe maka elevadu liu mak tanba fatór umanu”, tenik Komandante

Tránsito.

Inspetor Xefe António L. C. Soares haktuir katak maioria vitima husi asidente ne'e maka joven ho idade minoridade, tanba halai ho limiti velocidade másimu, lori motorizada ho kondisaun lanu no mós la respeita sinais tránsito ne'ebe maka iha. Tanba ne'e, Komandu PNTL liu husi Unidade Tránsito halo ona sosialisasaun ba estudante sira kona-ba Lei Kodigu Estrada no sinais Tránsito atu nune'e bele redus número asidente tráfitu.

Rekapitulasiun data asidente viasaun husi Munisipiu 13, Janeiro to'o Dezembru tinan 2016.

Munispiu	Kanek Kma'an	Kanek Todan	Mate	Total Kazu	Observasaun
Aileu	47	16	4	48	Prosesu Final 108
Ainaro	27	12	2	37	Prosesu ba
Baucau	192	38	6	175	Tribunal 52
Bobonaro	75	7	4	58	Sei Iha Prosesu
Dili	723	121	20	960	nia laran 690
Ermera	57	30	1	63	Rezolve Familiar
Covalima	27	9	4	28	889
Lautem	65	13	7	50	Fatór Ema 90 %
Liquica	145	27	11	127	Fatór Viatura 5 %
Manatuto	44	27	2	75	Fatór Dalan 5 %
Manufahi	63	44	3	47	
Oe-Cusse	37	7	3	30	
Viqueque	48	19	4	41	
Total :	1550	370	71	1.739	



Estatístiku Nasionál Insidente no Tránsito 2016



Estatístiku Insidente Nasionál 2016

Munisipiu	Setembru	Outubru	Novembru	Dezembru
Aileu	6	9	9	8
Ainaro	11	7	11	10
Baucau	22	18	18	14
Bobonaro	20	20	30	20
Cova Lima	12	24	12	10
Dili	139	144	111	153
Ermera	32	35	33	32
Lautem	11	6	10	7
Liquica	32	17	35	32
Manatuto	10	9	11	6
Manufahi	2	5	7	4
Oecusse	32	41	43	26
Viqueque	10	22	11	25
TOTÁL	339	357	341	347

Estatístiku Tránsito Nasionál 2016

Munisipiu	ASIDENTE HOTU-HOTU				VITIMA NE'EBÉ KANEK				ASIDENTE FATÁL			
	Set	Out	Nov	Dez	Set	Out	Nov	Dez	Set	Out	Nov	Dez
Aileu	5	9	4	2	10	13	4	1	0	0	0	1
Ainaro	3	2	2	5	2	2	3	7	0	0	0	0
Baucau	19	23	13	9	19	26	14	16	2	2	0	0
Bobonaro	0	5	2	10	0	4	3	17	0	1	0	1
Cova Lima	3	3	1	4	2	2	1	3	0	0	0	1
Dili	75	70	68	86	51	62	49	85	7	2	3	1
Ermera	4	2	9	2	4	4	13	3	0	0	0	0
Lautem	2	6	0	4	3	7	0	5	0	0	0	1
Liquica	10	9	9	20	16	7	9	28	1	1	2	1
Manatuto	5	7	4	6	3	6	6	8	0	0	0	0
Manufahi	3	4	6	5	4	15	10	12	1	0	0	0
Oecusse	2	2	2	3	11	1	0	9	0	0	2	1
Viqueque	3	4	4	5	2	5	20	12	1	1	0	1
TOTÁL	134	146	124	161	127	154	132	206	12	7	7	8

Photo:Estevao Pereira PNTL



Photo: Melquiades do Nascimento/PNTL



Photo: Melquiades do Nascimento/PNTL



Photo: Jeremias Dos Santos/PNTL

PNTL iha asaun



Photo: Jeremias Dos Santos/PNTL



Photo: Jeremias Dos Santos/PNTL



Photo: Tomas M Rodrigues/PNTL

Membru PNTL 114 partisipa Primeiru kursu ba sarjentu

Membru Polísia Nasional Timor-Leste. (PNTL) hamutuk na'in 114 ofisialmente partisipa iha abertura serimonia Primeiru Kursu formasaun ba Sarjentu ne'ebe maka hala'o durante fulan sia (9) nia laran.

Membru hirak ne'e kompostu husi Unidade no departamentu iha PNTL inklui mós membru Polísia husi nasaun Comunidade dos Países da Língua Portuguesa (CPLP) hamutuk na'in sia (9) husi Guiné-Bissau no São Tome e Príncipe.

Ministru Interior Dr. Longuinhos Monteiro iha diskursu ba serimonia ne'e apela ba partisipante sira atu aproveita oportunidade formasaun diak ida ne'e, atu bele sai professional liu tan hodi servi povu rai doben ida ne'e.

"Hau husu ba imi 114 atu halo aproveitamentu ne'ebe bo'ot durante formasaun fulan sia (9) nia laran, no hau espera katak bainhira imi remata iha loran 5 fulan Agostu tinan 2017, imi hirak ne'ebe agora hamrik iha oin sei mantein nafatin to'o formasaun ne'e remata", tenik Ministru Interior.

Dr. Longuinhos Monteiro akresenta tan katak, instruindo (partisipante) sira ne'ebe maka sei frekuenta kursu ida ne'e tenke sente orgulhu ba ann rasik tanba husi ema atus walu (800) resin ne'ebe maka konkore ba formasaun sarjentu nian, na'in 114 maka eskollidu hodi partisipa iha formasaun ida ne'ebe maka foin primeira vez halo halo hamutuk ho Polísia sira husi nasaun CPLP nian.

Iha fatin hanesan, Komandante Jerál PNTL em exersisiu Komisariu Polísia Faustino da Costa hateten primeiru kursu ba sarjentu ne'e, politika ida husi governu Timor-Leste. nian ne'ebe maka apresenta husi Ministeriu Interior, Ministeriu Administrasaun Interna CPLP nian hodi hato'o mai iha PNTL ne'ebe maka agora dadaun lidera hela Xefe Polísia CPLP iha 2015 to'o 2017.

"Husi ministeriu apresenta mai iha Komandu PNTL atu organiza eventu ida ne'e, katak eventu ida ne'e dala uluk ita halo seidak iha nasaun CPLP nian ida maka halo ona formasaun conjunta hanesan ita halo dadaun ne'e", hateten Segundu Komandante Jerál PNTL.

Komisariu Polísia Faustino da Costa salienta tan katak vaga ne'e fó ema 12 ba nasaun ha'at (4) hanesan São Tome e Príncipe, Cabo Verde, Guiné-Bissau no Guiné Equitorial maibé to'o agora hetan deit konfirmasaun husi nasaun rua hanesan Guiné-Bissau ne'ebe nia delegasaun kompletu ona hamutuk ema na'in 3, São Tome e Príncipe nian na'in 1 to'o ona no na'in 2 maka sei iha problema teknika, tuir planu semana oin sei to'o ona iha Dili. Nasaun São Tome e Príncipe mak husu atu aumenta tan sira nia kandidatu hodi partisipa iha kursu refere.

Kona-ba materia sira ne'ebe maka sei oferese iha kursu ne'e, Komisariu Polísia Faustino da Costa esplika, *"materia sira ne'ebe maka atu hanorin maka primeiru kona-ba professional, liu-liu iha nivel sarjentu nian hanesan lideransa, koñesimentu jerál, tekniku ne'ebe iha categoria sarjentu".*

Ba membru nasaun polísia CPLP sira ne'ebe maka la envolve iha formasaun ne'e, tuir Komisariu Polísia Faustino da Costa ne'ebe sai hanesan Presidente Komisaun Admisaun hateten oportunidade ne'e formasaun ne'e laos obligatoriu ba polisia nasaun CPLP sira, maibe fila fali ba sistema, estrutura, no hirakia kada nasaun nian ne'ebe la hanesan.

Entretantu representante partisipante ba kursu ne'e Henrique Ussumieue Ojafume husi nasaun Guiné-Bissau sente orgulhu no agradese ba governu Timor-Leste. liu-liu Komandu PNTL ne'ebe maka fó ona oportunidade hodi partisipa iha Primeiru Kursu ba Sarjentu.

Serimonia abertura Primeiru Kursu ba formasaun Sarjentu ne'ebe ho tema "Reforçar As Capacidades dos Nossos Sargentos Para Melhor Servir O Nosso Povo" ne'e, ofisialmente halo husi Ministru Interior, Komandante Jerál PNTL em exersisiu, Komandante Centro Formação Polícia (CFP), Komandante PNTL Munisipiu, membru Guarda Nacional Republicana (GNR), konvidadus no familia husi partisipante sira.



Photo: Melquides do Nascimento/PNTL

Komandu PNTL fo Posse ba Superior Nain 3

Komandu Polisia Nasional Timor-Leste (PNTL) fo tomada de posse ba Xefe Investigasaun Criminal, Xefe Departamentu Justisa no Xefe Departamentu Administrasaun e Planeamentu hodi okupa pojisaun ne'ebe mamuk atu halo servisu seguransa.

Komandante Jeral PNTL Komisariu Polisia Julio da Costa Hornay hateten Komandu koloka tuir nesiedade servisu Komandu nian no espera katak imi bele jere servisu ho diak iha fatin ne'ebe kolokadu, Nia hato'o asuntu ne'e iha nia Diskursu ba serimonia tomada de posse iha Kuartel Jeral Kaikoli Dili (22/12).

Komandante Jeral haktuiran katak Komandu tau fiar ba Superintendente nain tolu (3) ne'e koloka imi atu bele servisu ho diak hodi dezenvolve departamentu Justisa, Servisu Investigasaun Kriminal no Departamentu Administrasaun no Planeamentu no ejiji ba Ofisiais sira atu fo kontribuisaun servisu no sakrifisiu.

Superior nain 3 ne'ebe maka simu tomada de posse maka;

Xefe Servisu Investigasaun Criminal Superintendente Jorge Nelson Amaro Monteiro troka Superintendente Ludgerio Picancio Madeira Lay,

Xefe Departamentu Justisa Superintendente Orlando Gomes

no Xefe Departamentu Administrasaun e Planeamentu Superintendente Ludgerio Picancio Madeira Lay antes ne'e Superintendente Asistente Jose da Costa (matebian) maka asumi kargu ne'e.

"Hau husu atu servisu ho fuan, laran no neon hanesan Timor oan ho espirtu nasionalismu para atu servi povu no nasaun ho diak". hateten Komandante Jeral.

Iha serimonia tomada de posse ne'e ofisiais nain 3 halo komprimisiu ho juramentu ba bandeira RDTL no Konstituisaun atu halao knaar tuir lei no ordem.

Serimonia tomada de posse ne'e prezidi husi Komandante Jeral akompana husi Segundu Komandante Jeral no partisipa husi Ofisiais Superior PNTL.



Photos: Tomas M. Rodrigues/PNTL



2º Komandante Jerál PNTL

Vizita Servisu iha Munisipiu

"Inkontru ho komandante munisipiu sira maioria lamenta kona-ba menus ekipamentus eskritoriu no mobiliárius, tanba komputador ne'ebe sira uza balun antigu desde tempu UNTAET nian, maibé Komando sempre hato'o ba sira katak sasan hirak ne'e PNTL la preve no sosa kada tinan tanba orsamentu Jerál Estadu maka sei determina",

Komissariu Polisia Faustino Da Costa
Segundu Komandante Jerál PNTL.

Atu hare'e no rona difikuldade ne'ebe maka membru Polisia Nasional Timor-Leste. (PNTL) iha munisipiu idak-idak enfrenta, Segundu Komandante Jerál Komisariu Polisia Faustino da Costa vizita servisu iha munisipiu Cova-Lima, Ainaro no Manu-Fahi.

Komisariu Polisia Faustino da Costa hateten vizita servisu ba munisipiu sira ne'e ho objektivu atu halo enkontru ho estrutura tomak PNTL iha munisipiu hodi fahe informasaun kona-ba saida maka sira tenke halo hodi antisipa ba futuro.

Alende ne'e Komandante postu administrativu balun kestiona kona-ba motor no fasilidade ne'ebe Oficial Polisia Suku (OPS) sira simu tanba sira mós dala ruma sente dúvida hela tanba sá maka OPS sira simu motor no laptop, maibé Komandante postu administrativu sira la hetan fasilidade hirak ne'e.

"Hau informa ba sira prioridade komando PNTL nian tinan ida ne'e, ba oin hanesan kontinua tau prioridade primeru ba Polisiamentu Komunitaria tanba ne'e mak fasilita sira, prioridade segundu maka Tránsito tanba tinan-tinan

ema mate iha dalan barak liu kazu sira seluk entaun ita tau oinsa para iha munisipiu sira hatene sira atu halo cek point, sensibilizasaun informasaun kona-ba Kodigu Estrada no koalia ho autoridades tomak kona-ba risku ba transporte no mós prioridade terseru maka asuntu frontera ne'ebe sai problema nasional," Komisariu ne'e esplika.

Koalia kona-ba fronteira, ema hotu nia hanoir ba Batu-gade, Mota-Masin no parte Sakato, maibé fronteira bele mós iha parte seluk tanba infiltrasaun no transferensia husi sasan balun inklui ema bele mós fronteira ne'e iha Dili tanba ita iha Portu no Aeroportu tanba ne'e komando munisipiu sira mós presiza hatene no antisipa tanba tren merkadu ohin lora sai prekupasaun ba seguransa.

Durante vizita servisu ne'e além de halo enkontru ho komandante munisipiu no Komandante postu administrativu sira, hala'o mós aktividade motor cros iha Cova-Lima no promosaun diviza ba membru PNTL nain 319 ho postu Ajente prinsipal promovidu ba ajente Chefe iha munisipiu Ainaro.

Photos:Estevao Pereira/PNTL

SIKN ho PGR halo **distruisaun** ba **droga**

Polísia Nasional Timor-Leste. (PNTL) liu husi Servisu Investigaun Criminal Nasionál (SIKN) hamutuk ho Prokuradoria Geral Repúblika (PGR) dala uluk halo distruisaun droga kg 3,991.

Komandante SIKN Superintendente Ludgerio Lay hateten Servisu Investigaun Kriminal koopera ho parte hotu atu kombate aktu krime droga tama mai iha nasaun Timor-Leste.

"Desde inisiu Servisu Investigaun Kriminal hamutuk ho Ministeriu Públiku iha ona akordu ida hodi halo sosialisasaun ba iha eskola sira liu husi Polísia Komunitariu no mós iha vizita suku hodi esplika kona-ba droga nia efeitu, no maneira prevensaun".

Iha servisu ba kombate trafiku droga parte SIKN nafatin fó apoio ba iha Polísia Sientifika Investigaun Criminal (PSIC)-Ministeriu Justisa hodi hare'e aktu krime hanesan droga no krime koneksu sira seluk.

Iha Okaziaun ne'e Prokurador Geral da República Dr. José da Costa Ximenes hateten ho kooperasaun PNTL nian liu husi Servisu Investigaun Criminal Nasionál iha tinan 2014 ita halo operasaun bo'ot tolu ne'ebe konsege kaer arguidu na'in hat ba iha prosesu justisa.

Despaxu Distruisaun Ministeriu Públiku liu husi Prokuradoria Geral Repúblika nian katak entre arguidu na'in hat, arguida nia número prosesu NUK: 0147/2014 PNSIC ho objetu Droga Sabu-sabu" ho todan: 2,338 grams no arguidu nain rua (2) ho nia número prosesu NUK: 0147/14 PNSIC ho objetu Sabu-sabu Kristal ho tadan 4,67 grams.

Arguidu nain tolu (3) ne'e kaptura iha aeroportu Internasional Prezidente Nicolau Lobato no fronteira Batugade.

"Tribunal distrital Dili decide ona arguida ho número prosesu NUK: 0147/2014 PNSIC ho pena prizaun tinan 15 no arguidu ho número prosesu NUK: 0147/14 PNSIC ho pena prizaun tinan 13 fulan neen no arguidu ho número prosesu NUK: 0147/14 PNSIC ho pena prizaun tinan 10" Dr. José da Costa Ximenes hateten.

Ikus liu iha tinan 2014 PNTL kaptura arguido Venansio Madeira iha ninia residensia ho objetu Sabu-sabu Kristal no Esktase grama 1718 hafin prosesu Tribunal Distrital Dili kondena arguido ho pena prizaun tinan hitu.

Prokurador Jeral iha nia mandatu iha prioridade importante maka kombate kriminalidade organizada hanesan korupsaun, droga no krime koneksu sira seluk.

Antes termina Prokurador Geral Republika apela ba Joventude sira atu hadok ann husi droga tanba bele estraga futuru nasaun Timor-Leste.

"Iha oportunidade ida ne'e hau hakarak aviza ba maluk Timor oan sira liu-liu juventude sira katak droga ne'e ladiak, fo impaktu ba saúde fisiku, kauza Psikologiku ne'ebe bele halo ema lakon konsiensia, la lakon fiar ann no bele transforma ema ho karakter mais violentu.Nia hateten.



Photo:Jeremias Dos Santos/PNTL



Photo: Melquiades do Nascimento/PNTL

Membru UPM nain **21** Simu Graduasaun

"Komandu no membru UPM tomak kontinua mantein disiplina, servisu maka'as no kumpri imi nia misaun ho responsabilidade no dignidade hodi la'o ba oin nune'e bele asegura husi kriminozu sira ne'ebe bele utiliza ita nia tasi hodi halo asaun krime ne'ebe ita lahakarak iha ita nia rain".

Komisariu Polísia **Júlio da Costa Hornay**
Komandante Jerál PNTL

Membru Unidade Polisia Maritima (UPM) nain 21 simu graduasaun no ofisialmente integra iha Unidade Polisia Maritima (UPM) hodi halo servisu kontrola tasi, graduasaun ne'e halo tuir tradisaun UPM nian hodi nani tasi no foti boña iha tasi klaran.

Komandante Jeral PNTL Komisariu Polisia Julio da Costa Hornay hateten orgullu ba Komandu UPM bele treina membru sira no prepara unidade ida ne'e diak ba daudauk hahu'u ho membru nain 27 to'o ohin lora atinji ona membru nain 155 no sei aumenta nafatin to'o alkansa numeru ne'ebe maka ita nesesita, Nia hato'o asuntu ne'e iha serimonia graduasaun ba membrus UPM iha Kuartel UPM Lecidere Dili foin lalais.

Nia haktuir tan katak Unidade ida ne'e reprezenta feto sira nia kapasidade, matenek no involvimentu iha parte hotu hanesan ohin ita hare'e no asisti feto sira bele nani hamutuk ho mane sira ho distansia hanesan no bele halo buat hotu hanesan ho mane sira, parabens ba feto PNTL no espesial ba feto UPM.

Iha okajiaun ne'e Komandante UPM Superintendente Lino Saldanha hateten Unidade Maritima iha nia doutrina rasik katak tenke prontu bokon, metan, servisu ekipa no servisu tuir Lei no Ordem no prontu mate bainhira la hatene nani tasi.

Nia haktuir tan katak UPM mos iha karakter integridade, responsabilidade, no disiplina ne'ebe ass hodi kontrola tasi no tenke badinas no matenek hodi servi povu no nasaun ne'e ba oin tanba ne'e husu ba membru UPM nain 155 atu banati tuir dutrina no karakterisitka ne'e.

Atu garante estabilidade no seguransa tenke tau iha pratika maka tenke iha responsabilidade, disiplina, badinas no matenek atu servisu diak no fo forsa ba Komandu Jeral no Ministeriu Interior atu servisu maka'as liu tan.

Antes termina Komandante ne'e mos husu ba Ministeriu Interior, Komandu Jeral no parseiru sira atu apoiu nafatin Unidade ne'e hodi bele dezenvolve aan diak liu tan tanba ho imi nia apoiu maka unidade ne'e bele hakat ba oin tanba haumutuk ho imi ita bele halo buat barak no lao ba oin.

Serimonia Taka Boña ba membrus UPM ne'e kompleta ho Lansamentu Monumentu UPM husi Komandante Jeral no Segundu Komandante Jeral ho prezensa husi Prezidente CNE Alcino Baris, Atase POLRI iha Embaixada Indonezia, Prezidente Komite 12 Novembru Gregorio Saldanha, Diretor Jeral Ministreriu Interior, Diretor PSIC, Komandante Komponente Naval F-FDTL, konvidadus no familia graduadu sira.

Eleisaun Jeral 2017 Preparasaun **forsa seguransa** hodi **asegura**

Photos:Estevao Pereira/PNTL

“ Eleisaun Jeral tinan 2017 Primeira vez iha istoria Timor-Leste rasik organiza no PNTL maka halo seguransa ba eleisaun ida ne’e kompara ho eleisaun dala tolu ne’ebe maka halao tia ona ho apoiu masimu husi Nasões Unidas “.

Komisariu Polisia **Júlio da Costa Hornay**
Komandante Jeral Polisia Nasional Timor-Leste

Eleisaun Jeral hanesan momentu inportante ba povu Timor-Leste atu ezerse sira nia direitu ba vota hodi eskolla Kandidatu Prezidente no Partidu Politiku ne’ebe maka sira tau fiar atu ukun no servi sira durante periodu tinan 5 nia laran (2017-2022).

Bazeia ba kalendariu ne’ebe maka fo sai Prezidente Republika dekreta ona loron 20 fulan Marsu sei halo eleisaun Prezidensial no 20 fulan Juliu sei halo eleisaun Parlamentar .

Atu hasoru eventu inportante rua ne’e maka Polisia Nasional Timor-Leste (PNTL) nudar Forsa seguransa sei halao servisu makaas hodi kria estabilidade no paz hodi nune’e festa demokrasia ne’ebe maka povu Timor-Leste halao bele lao iha situasaun paz no trankulidade hodi asegura no salva guarda direitu ema ida-idak ninian atu bele hili sira nia lider no naiulun tuir sira nia desijaun.

Eleisaun Jeral tinan 2017 hanesan Primeira vez iha istoria Timor-Leste rasik organiza Eleisaun Jeral no ita nia forsaseguransa maka fo seguransa ba eleisaun ida ne’e kompara ho eleisaun dala tolu ne’ebe maka halao tia ona ho apoiu masimu husi Nasões Unidas.

Atu asegura Eleisaun Jeral bele lao ho estabilidade no paz maka prezisa kolaborasaun husi parseru sira, no ema hotu ne’ebe hela iha Timor-Leste.

Preparaun ba Eleisaun Jeral :

- Hahu iha fulan Janeiru PNTL halo ona preparaun lubuk ida hanesan fo formasaun ba Oficial Polisia Suku (OPS) liu husi koperasaun entre PNTL, CNE no STAE atu nune’e OPS sira kompriende regras eleitoral nomos prosesu eleisaun nune’e sira bele responde no atende ho diak

OPS ida-idak presija identifika saida deit maka sai amiasa no perturba prosesu Eleisaun, potencia amiasa saida maka lor-loron sira hare iha sub distritu no suku hodi prepara asaun Polisia nian maka asaun preventiva no represiva nune’e bele minimija konfliktus durante prosesu Eleisaun.

Formasaun ne’ebe maka halao durante semana ida ne’e foka liu konaba Funsau Polisia ligadu ho servisu iha terrenu , aspetu sosial ekonomiku hodi hare oinsa sira bele halao servisu iha baze ho diak liutan.

- Komandu PNTL halo enkontru ho Komandante

PNTL munisipiu 13 sira hodi halo planu operasaun no identifika dejafiu no problema ne’ebe munisipiu sira infrenta no buka solusaun hamutuk manera seluk ne’ebe maka ami halo faze preparasaun liu husi identifikasaun geografia munisipiu ida-idak, identifika partidu ne’ebe maka ejisti, identifika suku no aldeia ne’ebe maka difisil asesu ba transporte tanba eleisaun jeral nebe sei halao iha fulan Marsu ne’e tempu udan tanba ne’e PNTL antisipa hodi hare kapasidade PNTL nian atu asegura eleisaun ne’e.

- Komandu PNTL mos halo ona Security Briefing hamutuk ho adidu seguransa no defeza husi konsulado no embaxada iha Timor-Leste hodi informa situasaun seguransa no preparaun Eleisaun Jeral.

Liu husi Security Briefing ne’e hodi informa ba embaixada sira nia adidu atu hatene situasaun seguransa lolos iha Timor-Leste hodi prevene informasaun falsu husi fontes ne’ebe la klaru.

Security Briefing ba dala rua ne’e partisipa husi adidiu seguransa husi Embaixada Indonezia, Filipina, Portugal, Japaun, Korea, Cina, Brazil, Malaysia, Brunai Darusalasam Uniaun Europeia, Parseru AFP, IOM, UNDSS no seluktan.

- Atu garantia seguransa ba Eleisaun Jeral maka Membru PNTL nain 3800 preparadu atu fo seguransa ba sentru votasaun 690 iha teritoriu Timor-Leste laran tomak durante Eleisaun Prezidensial no Parlamentar, kolokasaun membru iha Sentru Votasaun bazeia ba numeru votatentes no potencia amiasa ba konfliktu.

PNTL mos iha Forsa Reserva no Unidade Espesial hodi

servisu movel nune’e wainhira mosu problema ruma forsarezerva iha atu responde alende ne’e sei koloktan Unidade Especial hodi fo seguransa ba Eleisaun iha munisipiu Baucau, iha parte rai klaran Aileu, Ainaro no Same sei koloka minimu peltaun ida no Maliana hodi reforsa parte Suai.

Iha prosesu preparasaun PNTL identifika sentru votasaun ne’ebe maka nia votantes barak liu, potencia amiasa boot ba konfliktu, no sentru votasaun ne’ebe maka difisil asesu ba transporte no komunikasaun atu define hodi koloka nia membrus seguransa.

Preparaun PNTL atinji ona %90 hodi bele responde ba festa demokrasia ne’ebe maka sei halao iha tinan ne’e no asegura eleisaun ne’e bele lao ho susesu.

Atu fasilita servisu seguransa maka Governu liu husi Ministeriu Interior aloka ona Orsamentu Jeral Estadu tinan 2017 ho montante \$ milaun rua hodi sosa ekipamentu Anti Riot kompania Norinco husi Cina ne’ebe kompostu husi Kapasete, STIK, Gas Lakrimojenio, ekipamentus anti bala no seluktan hamutuk kontentor 10 resin.

Ekipamentus hirak ne’e to’o Timor iha semana daruak fulan Marsu no distribui ba Komandu PNTL munisipiu 13 no Unidade hirak ne’ebe maka sei apoia ba seguransa Eleisaun Jeral.

Eleisaun Jeral fo oportunidade ba povu Timor-Leste atu ejerse sira nia direitu, knaar no dever ba atividade demokrasia ne’ebe maka halao tanba ne’e liu husi kordenasaun ho CNE no STAE atu bele fasilita informasaun oinsa maka PNTL bele prepara ninia aan didiak hodi responde situasaun ruma bainhira akontese.



Photo:Jeremias Dos Santos/PNTL

Polisiamentu Komunitaria PNTL Avalia Program Management Committee Meeting (PMC) Ho Parseiru

“Husi apoio hirak ne’ebe maka parseiru sira fó, progresu sira ne’e maka hanesan kolokasaun Oficial Polisia Suku (OPS), Konsellu Polisiamentu Komunitariu (KPK), Konsellu Seguransa Munisipiu (KSM) nia apoio servisu iha prevensaun konflitu iha nivel aldeia, suku to’o mai iha nivel nasional”,

Komisariu **Júlio da Costa Hornay**,
Komandante Jerál PNTL

Atu hadia diak liu tan servisu Departamentu Polisiamentu Komunitariu, Komandu Polisia Nasional Timor-Leste. (PNTL) realiza sorumutu hamutuk ho parseiru desenvolvimento sira hanesan Embaixada Nova Zelandia (NZ), Polisia NZ, JICA (Ajensia Kooperasaun Internasional Japaun), The Asia Foundation (TAF), no BELUN hodi avalia programa servisu ne’ebe hala’o ona durante periodu fulan Janeiru-Outubru 2016.

Komandante Jerál PNTL Komisariu Polisia Julio da Costa Hornay ne’ebe halo abertura ba iha Enkontru PMC ne’e hateten Komandu apresia ho apoio parseiru sira nia mai iha PNTL ne’ebe iha avansu bo’ot, liu-liu ba iha departamentu Polisiamentu Komunitaria tanba hetan konfiansa másimu husi comunidade.

Iha tinan 2009, Polisia Nova Zelandia hahu’u servisu parseria ho PNTL ho relasaun ba projetu pilotu iha area formasaun ne’ebe hamutuk ho parte polisia komunitariu desenvolve kurikulum formasaun ba polisia komunitariu nian. Ajensia Kooperasaun Internasional Japaun (JICA) durante sai hanesan parseiru ho PNTL, kada tinan apoio formasaun ba membrus Oficial Polisia Suku (OPS) sira liu husi aktividade Estudu Komparativu ne’ebe hala’o iha Japaun no Indonesia, atu oinsa hare’e kona-ba implementasaun servisu polisia komunitariu nian.

Nune’e mós iha tinan 2008, TAF hahu’u servisu iha parseira ho PNTL kona-ba projetu pilotu atu hamenus konflitu liu husi Polisiamentu Orientadu ba Komunitade (POK). Durante ne’e, TAF apoio ba iha Formasaun ba Formador (TOT) ne’ebe haktuir iha Lei Organika PNTL 2009 nian

pesoal Departamentu Nasional ba Polisiamentu Komunitariu (DNPK) no Sentru Formasaun Polisia iha responsabilidade atu desenvolve formasaun kona-ba asuntu sira ho relasaun ba implementasaun polisiamentu komunitariu. TAF oferese formasaun TOT ba OPS sira kona-ba estabeleimentu Konsellu Polisiamentu Komunitariu (KPK) no estabeleimentu Konsellu Seguransa Munisipiu (KSM).

Tuir Xefé Departamentu Polisiamentu Komunitariu Superintendente Asistente António da Luz hateten objetivu husi annual metting ne’e, atu hare’e progresu servisu polisia komunitariu nian durante ne’e.

“Objetivu husi enkontru ne’e mak Komandu PNTL liu husi departamentu polisia komunitariu hamutuk ho parseiru sira organiza atu bele hare’e kona-ba progresu servisu polisia komunitariu nian hamutuk ho parseiru sira trasa ona iha planu annual ninian ne’ebe maka hetan aprovasaun husi Komandante Jerál atu implementa iha tinan 2016”, subliña Xefe Departamentu Polisiamentu Komunitariu.

Superintendente Asistente António da Luz akresenta liu tan katak resultadu husi aktividade hirak ne’ebe maka hala’o ona iha tinan 2016 apresenta iha enkontru ne’e atu bele hetan apresiasaun, sujestaun balun husi komandu no parseiru sira atu bele hare’e kontinuasaun ba iha programa polisia komunitaria nia iha tinan 2017.

Além de apresenta progresu servisu, iha sorumutu ne’e hato’o mós dezafiu ne’ebe maka departamentu Polisiamentu Komunitariu hasoru inklui mós parseiru sira maka hanesan Eleisaun Suku atraza formasaun no Re-estruturasan ba KPK sira.



Photo:Jeremias Dos Santos/PNTL

Komandu PNTL Entrega Laptop ba OPS



Photo: Melquiades do Nascimento/PNTL

Komandu Polisia Nasional Timor-Leste (PNTL) entrega Laptop 442 ba Oficial Polisia Suku (OPS) atu nune’e bele fasilita sira nia servisu ho diak liutan.

Komandante Jeral PNTL Komisariu Polisia Julio da Costa Hornay hateten ho apoiu governu komandu PNTL prepara hodi fasilita OPS sira nia servisu iha baze tanba OPS sira ne’e servisu individual iha comunidade nia leet tanba ne’e Komandu fasilita sira ho transporte no ekipamentu IT atu nune’e sira bele utilija ba servisu no halo relatoriu konaba servisu ne’ebe maka sira halao, hato’o asuntu ne’e iha serimonia entrega laptop nne’ebe maka halao iha Centru Formasaun Polisia Comoro Dili foin lalais.

Komisariu Julio haktuirtan katak antes antrega laptop ne’e ba OPS sira seksaun IT hanorin membru hirak ne’e durante loron tolu konaba oinsa atu utilija.

Laptop 442 ne’ebe maka entrega ba OPS iha suku 442 iha teritoriu Timor-Leste ne’e sosa ho

Orsamentu Jeral Estadu(OJE) tinan 2016 no espera katak ho facilidade ne’ebe maka Komandu fasilita bele suporta sira iha baze hodi halo servisu ho diak no relata mai Komandu.

KSM Ermera halo enkontru ho KPK no OPS

Konselu Seguransa Munisipal (KSM) Ermera halo enkontru ho Konselu Polisia Komunitaria (KPK) no Oficial Polisia Suku (OPS) hodi prepara atividade ba tinan 2017. Diretor Departamentu Polisia Komunitaria Superintendente Asistente Antonio da Luz hateten KSM nia servisu atu akumula informasaun husi KPK no comunidade konaba problema saida deit maka comunidade enfrenta hanesan problema seguransa no problema sosial seluk nune’e liu husi enkontru KPK bele rezolve asuntu hirak ne’e, Nia hato’o asuntu ne’e iha Enkontru Konselu Seguransa Munisipal iha Kuartel PNTL munisipiu Ermera.

Komandante da Luz haktuirtan katak enkontru membru KSM Ermera ho autoridade lokal, Xefe de Suku, Komandante Eskuadra no OPS sira hanesan faze inisiu tama ba tinan 2017 oinsa maka sira bele prepara atividade hodi responde ba Eleisaun Jeral nomos atividade seluk ne’ebe maka halao iha comunidade.

Xefe Suku Poetete Postu administrativu Ermera Felisberto das Neves hateten postu Ermera iha suku Poetete no Remarhei estabelelese KPK iha 2014 to’o agora Xefe suku ho OPS sira halao servisu ho diak liu husi kordenasaun no koperasaun diak no wainhira mosu problema iha comunidade nia leet maka OPS ho autoridade lokal rezolve hamutuk ho parte sira ne’ebe maka hasoru problema.

Manera resolve problema iha Polisia Komunitaria uja sistema PARA (Peskiza, Analiza, Responde no halo Avaliasaun) sistema ne’e maka OPS sira uza hodi resolve problema ne’ebe maka akontese iha suku.

Iha prosesu resolve problema fahe ba kategoria rua Krime no Sivil, PNTL no autoridade komunitaria sir abele resolve probela sivil bai-bain hanesan istori malu no hadau malu rai maibe labele resolve kazu krime tanba kazu krime tenke relata ba Ministeriu Publiku.

KSM iha nivel munisipiu nia prezidente Konselu maka Komandante munisipiu no vice maka Prezidente Autoridade munisipiu, KPK iha nivel suku no Xefe Suku maka sai hanesan Xefe KPK no sub Xefe maka OPS sira.

Enkontru KSM munisipiu Ermera prezidi husi Komandante munisipiu Ermera Superintendente Natercia Martins akompaña husi Diretor Departamentu Polisia komunitaria, parseiru The Asia Foundation, Polisia Nova Zelandia no ho prezensa Komandante Jeral PNTL hodi fo motivasaun ba Komandu PNTL munisipiu Ermera atu halao servisu makaas liutan.



Photo:Tomas M Rodrigues/PNTL



Membru OPS halo partolia lao Ain

Photo: Melquiades do Nascimento/PNTL